

Powšitkowne WOZJEWJENJA

njedźelu, 4. junija 2017

Putniske kemše z biskopom

Swjatki pónđzelu, 5. junija, přijědže Drježdžansko-Mišnjanski biskop Heinrich Timmerevers do Róžanta. Wón změje tež putniske kemše wonka na łuce a předowanje. Hudźbnje wobrući je chór 1. serbskeje kulturneje brigady pod nawodom Friedemanna Böhmy. Serbski rozhlós putnisku Božu mšu wot 9 hodź. originalnje wusyla.

Serbska kwasna rewija

Wšitkich zajimcow, kotřiž so za serbsku rěč a kulturu horja, přeprošuje Chróšćanska Serbska zakładna šula „Jurij Chěžka“ na „Kwasnu rewiju“ z pjera Wórše Wićazoweje. Tutu zahraja šulerjo w serbskej kwasnej katolskej drasće rěčo, spěwajo a rejujo srjedu, 7. junija, we 18 hodź. w Chróšćanskej „Jednoće“.

Putnikowanje młodžiny

Lubi młodostni, wutrobnje přeprošujemy was na putnikowanje młodžiny njedźelu, 11. junija, do Róžanta. Lětsa chcemy wšitcy zhromadnje do Róžanta putnikować. Zetkamy so tuž w 10.00 hodź. w Sernjanach na nawsy. Kóžda wosadna młodžina njech přinjese prošu swoju dekanatnu młodžinsku chorhoj sobu.

Putniske kemše budu w 10.30 hodź. w cyrkwi. Božej mši přizamknje so wobjed. Kónčny nyšpor z mytowanjom hudźbneho wubědžowanja budže w 12.30 hodź.

Wutrobnje strowja farar Gabriš Nawka, Lucija a dekanatny kružk

Oratorij „Podlěčo“ zaklinči w Róžeńće

Oratorij „Podlěčo“ z pjera Handrija Zejlerja a Korle Awgusta Kocora zaklinči njedźelu, 11. junija, we 18 hodź. w Róžeńčanskej cyrkwi. Pod nawodom Friedemanna Böhmy spěwa chór 1. serbskeje kulturneje brigady a hudźi orchester Serbskeho ludoweho ansambla. Solisća budu Romy Petrik (sopran), Tanja Donatec (alt), Mikołaj Jan Walerych (tenor) a Johannes Hochrein (bas). Wšitcy smědža so na hudźbnu chłóšćenku wjeselić a su wutrobnje do Róžanta přeprošeni.

Ministrantska kopańca

Na koparski turněr su ministranća ze serbskich wosadow přeprošeni. Tutón wotměje so sobotu, 17. junija, w Pěskecach. Započatk budže w 9.00 hodź. z Božej mšu we wjesnej cyrkwičce. Nadrobniše informacije su na plakaće pod www.posol.de podate. Tež we wosadach su plakaty wupowěsnjene.

Klóšterski swjedzeń

Z Božej mšu, kotruž změje pater Maurus Kraß z Wechselburga, zahaji so klóšterski swjedzeń njedźelu, 18. junija, w 10.30 hodź. w cyrkwi klóštra Marijineje hwězdy w Pančicach-Kukowje. Po kemšach, kotrež wobrući Kulowski młodžinski chór „Effata“, wočakuje wopytowarjow pisany program. Mjez druhim zahraje kantor Michael Schmidt z Kamjenicy w 13.15 hodź. w cyrkwi na piščelach. Z ekumeniskim nyšporom w 17.30 hodź. so swjedzeń zakónči.

Putnikowanje do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěl. Termin putnikowanja je wot 5. do 15. awgusta. Zajimcy njech so hač do njedzele, 2. julija, pola fararja Bena Jakubaša w Radworju přizjewja, telefonowe čisło (0 3 59 35) 2 07 13.

Z papu so zahorić dać

Nanojo ze swojimi dźěćimi – wot předšulskeje staroby – su wot pjatka do njedzele, 9. do 11. junija, do Smochčanskeho Domu biskopa Bena přeprašeni. We wšelakich akcijach, hrach a rozmołwnych kołach chcedža so wěnować prašenju, što to woznamjenja, hdyž za něšto pališ, so horiš, hdyž sy zahorjeny a hdyž so jedyn druheho z něčim zahori. Tež wopyt Budyskeje wohnjoweje wobory je zaplanowany. Zajimcy njech so pod telefonowym čislom (03 59 35) 2 23 17 w Smochćicach přizjewja.

Kolesujo putnikować

K putniskemu tyнденjej na kole přeprašuje Smochčanski Dom biskopa Bena wot 13. do 20. awgusta. Čary powjedu po holi a hatach, po serbskich wsach, hornjołužiskich horach, podłu Łobja a Nysy. Zajimcy měli so w Smochćicach pod telefonowym čislom (03 59 35) 2 23 15 přizjewić.